

後
邨
別
調
全

後村別調

後村別調

目錄

滿江紅

十四調

風入松

四調

水龍吟

四調

浪淘沙

四調

念奴嬌

三調

六州歌頭

一調

沁園春

五調

摸魚兒

二調

賀新郎

九調

卜算子

二調

一翦梅

一調

木蘭花慢

三調

最高樓

二調

臨江仙

四調

昭君怨

二調

清平樂

四調

長相思

五調

菩薩蠻

一調

玉樓春 一調

生查子 一調

憶秦娥 五調

鵲橋仙 一調

踏莎行 一調

水調歌頭 九調

哨徧 一調

賀新郎 二十調

沁園春 四調

摸魚兒 一調

一翦梅 一調

滿庭芳 一調

鷓鴣天 二調

卜算子 一調

木蘭花慢 一調

念奴嬌 二調

後村別調目錄 終

後村別調

宋 劉克莊

滿江紅

夜雨涼甚忽動從戎之興

金甲瑠玑記當日
轅門初立磨盾鼻
一揮千紙龍蛇猶
溼鐵馬曉嘶營壁冷
樓船夜渡風濤急
有誰憐猿臂故
將軍無功級
平戎策從軍什
零落盡慵收拾把茶經
香傳時時溫習
生怕客談榆塞事
且教兒誦花間集
嘆臣之壯也不如人
今何及

又

二月二十四夜飲海棠花下作

老子年來頗自許
心腸鐵石尙一點
消磨未盡愛花成
癖懊惱每嫌寒勒住
丁寔莫被晴烘折
奈暄風烈日太

無情如何得 張畫燭頻頻惜憑素手輕輕摘更一番
雨過彩雲無迹今夕不來花下飲明朝空向枝頭覓對
殘紅滿院杜鵑啼添愁寂

又

范尉
梅谷

赤日黃埃夢不到清溪翠麓空健羨君家別墅幾株幽
獨骨冷肌清偏要月天寒日暮尤宜竹想主人杖屨繞
千迴山南北 寧委澗嫌金屋寧映水羞銀燭歎出羣
風韻背時裝束競愛東鄰姬傅粉誰憐空谷人如玉笑
林逋何遜漫爲詩無人讀

又

送宋惠父
入江西幕

滿腹詩書餘事到穰苴兵法新受了烏公書幣著鞭垂

發黃紙紅旗喧道路黑風青草空巢穴向幼安宣子頂
頭行方奇特 谿峒事聽僂說龔遂外無長策便獻俘
非勇納降非怯帳下健兒休盡銳草間赤子俱求活到
崆峒快寄凱歌來寬離別

又

落日登樓誰管領倦游狂客待喚起滄浪漁父隔江吹
笛看水看山身尙健憂晴憂雨頭先白對暮雲不見美
人來遙天碧 山中鶴應相憶沙上鷺渾相識想石田
茆屋草深三尺空有鬢如潘騎省斷無面見陶彭澤便
倒傾海水浣衣塵難湔滌

又

送王
實之

天壤王郎數人物方今第一談笑裏風霆驚座雲煙生
筆落落元龍湖海氣琅琅董相天人策問如何十載尙
青衫諸侯客 易愛底些官職難保底些名節擬閉門
投轄劇談三日疇昔評君天下寶當爲天下蒼生惜向
臨分慷慨出商聲摧金石

又壽王
實之

鶴馭來時長占定一年清絕九萬里纖雲收盡帝青空
闕月露偏爲丹桂地風霜欲放黃花節聽玉笙縹緲度
緱山吹初徹 曾直把龍鱗批曾戲取鯨牙拔向絳河
濯足咸池晞髮俗子底量吾輩事天仙不在矚儒列世
豈無瑤草與蟠桃堪攀掇

又和王實之韻
送鄭伯昌

怪雨盲風留不住江邊行色煩問信冥鴻高士釣鰲詞
客千百年傳吾輩話二三子繫斯文脈聽王郎一曲玉
簫聲淒金石 晞髮處怡山碧垂釣處滄溟白笑而今
拙宦它年遺直只願長留相見面未宜輕屈平生膝有
狂談欲吐且休休驚鄰壁

又
四首並
和實之

往日封章曾聳動君王玉色今似得三閭公子四明狂
客古不能箝言者口天方欲壽中朝脈算人間豈有病
無醫須鍼石 年冉冉袍猶碧心耿耿頭先白笑臣舒
迂緩臣山愚直拂袖歸來羞炙手望塵拜了難伸膝把

富春瀨與首陽山圖齋壁

又

三黜歸來飯蔬食渾無愠色中年後家如旅舍身如行
客軒冕豈非疣贅具煙霞已是膏盲脈有些兒隙地更
疏泉堆卷石鄰媪餉新芻碧溪友賣鮮鱗白向陳編
冷笑孔明元直俗事不教汗兩耳燕居聊可盤雙膝取
當年行腳一枝筇懸高壁

又

疇昔臚傳仗下奏祥雲五色何況是西山弟子鷓山賓
客上帝照臨忠義膽老師付受文章脈問此君髣髴似
何人徂徠石圍官菜登盤碧田舍米翻匙白懶投詩

見素寄書杓直德耀不嫌爲隱髻龜兒已解搖吟膝有
誰憐給札老相如家徒壁

又

下見西山料它日面無慙色君記取不爲呂黨亦非秦
客檜有有意挽回當世事無方延得諸賢脈笑海波渺
渺幾時平空啣石 園五畝紛紅碧家四世傳清白任
天孫笑拙女嬃嫌直老去何煩援以手向來不要加諸
膝待深山深處著茆齋看青壁

又唐
夫人

八十加三人盡訝還童返少爭信道夜春曉織總曾經
了凜凜共姜當日誓諄諄孟母平生教到如今象服擁

魚軒天之報 如船藕如瓜棗班衣舞金鐘
酌望秋宵一點老人星照塵世少如孃福壽
上蒼知得兒忠孝待看它孫子又生孫添懷抱

又

和吳叔永尙書時吳喪少子

著破青鞵渾不憶 蹋它龍尾更冷笑
癡人擘劃二三百歲殤子彭篋誰壽天靈均
漁父爭醒醉向江天極目羨禽魚悠然矣
杯中物姑停止牀頭易都拋廢慨事常八九
不如人意白雪調高九協律落霞語好終傷綺
待煩公老手一摩挲文公記

風入松

福清道中作

橐泉夢斷夜初長 別館淒涼細思二十年
中事歎人琴

已矣俱亡改盡潘郎鬢髮銷殘荀令衣香 多年布被
冷如霜到處同牀簫聲一去無消息但回首天海茫茫
舊日風煙草樹而今總斷人腸

又同
前

歸鞍尙欲小徘徊逆境難排人言酒是銷憂物奈病餘
孤負金罍蕭瑟搗衣時候淒涼鼓缶情懷 遠林搖落
晚風哀野店猶開多情惟是燈前影伴此翁同去同來
逆旅主人相問今迴老似前迴

又
癸卯至石塘追
和十五年
前韻

殘更難睡抵年長曉月淒涼芙蓉院落深深閉歎芳卿
昔在今亡絕筆無求鳳曲癡心有返魂香 起來休鐫

鬢邊霜半被堆牀定歸兜率蓬萊去奈人間無路茫茫
緣斷漫三彈指憂來欲九迴腸

又同

攀翻宰樹暫徘徊草草安排昔人徒步陳雞絮愧公家
僕馬觥罍華表舊愁滿目黃梁殘夢傷懷 欲將莊列
等歡哀對卷慵開憑高指點虛無路問何年遼鶴歸來
宿酒得風漸解小輿待月同迴

水龍吟

己亥自壽

年年歲歲今朝左弧懸罷渾無事吾衰久矣我辰安在
老之將至懶寫京書怕看除目敗人佳思把東籬掩定
北窗開了悠然酌頽然睡 客有過門投贄道先生訪

華胥氏誰能辛苦陪
它綺語記它奇字屈指先賢戴花
老監豈其苗裔待異時約取寬夫彥國人耆英會

又

先生放逐方歸不如前輩抽身早
臺郎舊秩看來俗似散人新號起舞非
狂行吟非怨高眠非傲歎終南捷徑
太行盤谷用卿法從吾好閉了草廬長
嘯後將軍來時休報牀頭書在古人出
處今人非笑製箇淡詞呷些薄酒野花
簪帽願雲臺任滿又還因任賽汾陽考

又自和
前韻

病翁一榻蕭然

劉屏山
號病翁

不知世有歡娛事
雀羅庭院載

醪客去催租人至報答秋光要些
酒量要些詩思奈長

鯨龍吸寒蛩息響茶甌外惟貪睡窮巷幸無干贄或
相過莫知誰氏柴門草戶闕人守舍任伊題字自和山
歌國風之變離騷之裔待從今向去年年強健插花高
會

又

平生酷愛淵明偶然一出歸來早題詩信意也書甲子
也書年號陶侃孫兒孟嘉甥子疑狂疑傲與柴桑樵牧
斜川魚鳥同盟後歸于好除了登臨吟嘯事如天莫
相諮報田園閒靜市朝翻覆回頭堪笑節物催人東籬
把菊西風吹帽做先生處士一生一世不論資考

浪淘沙

旅况

紙帳素屏遮全似僧家無端霜月闌窗紗喚起玉關征
戍夢幾疊寒笳 歲晚客天涯短髮蒼華今年衰似去
年些詩酒新來都減價孤負梅花

又

疊嶂碧周遮游子思家掩藏白髮賴烏紗落日倚樓千
萬恨社鼓城笳 老去淡生涯虛擲年華臘茶孟子太
清些待得癡兒公事畢謝了梅花

又

丁未
生日

去歲詣公車天語勤渠絳紗玉斧照寒儒恰似昔人曾
夢到帝所清都 骨相太清臞謫墮須臾今年黃勅換
稱呼只爲此翁霜鬢禿老不中書

又

早歲類寒蛩晚節遭逢會開黃卷侍重瞳歸去青藜光
照牖階藥翻紅 出晝頗匆匆主眷猶濃除官全似紫

陽翁

寶文
漳州

換箇新街頭面改又似包公

辭郡得
小龍

念奴嬌

水犀

繞籬尋菊菊猶遲舍北芙蓉渾未卻是小山叢桂裏一
夜天香飄墜約束奴兵丁甯稚子莫掃青苔砌風高露
冷倚闌疑匪人世 客有載酒過予朗吟招隱洗盡悲
秋意白髮長官窮似蝨剛被天公調戲徧地堆金滿空
雨粟不濟淵明事殘英賸馥明朝猶可同醉

又菊

花

老夫白首尙兒嬉廢圃一番料理餐飲落英并墜露重
把離騷拈起野豔幽香深黃淺白占斷西風裏飛來雙
蝶繞叢欲去還止 嘗試詮次羣芳梅花差可伯仲之
間耳佛說諸天金色界未必莊嚴如此尙友靈均定交
元亮結好天隨子籬邊坡下一杯聊泛霜蕊

又

壬寅
生日

比如去歲前年今朝差覺門庭靜玉軸錦標無一首知
道先生遠佞假使文殊攜諸菩薩來問維摩病無花堪
散亦無香積齋襯 回首雪浪驚心黃茆過頂瘴毒如
炊甑山鬼海神俱長者饒得書生窮命不慕飛仙不貪
成佛不要鑽天令年年今日白頭母子家慶

六州歌頭

丹牡

維摩病起兀坐等枯株
清晨裏誰來問是文殊
遣名姝奪盡羣芳色
浴纔出醒初解
千萬態嬌無力
困相扶
絕代佳人不入金張室
卻訪吾廬對茶鐺
禪榻笑殺此翁癯
瑤砌金壺始消渠
憶承平日繁華事
修成譜寫成圖
奇絕甚歐公記
蔡公書古來無一自京華
隔問姚魏竟何如
多應是彩雲散劫灰餘
野鹿啣將花去
空回首河洛邱墟漫傷春
弔古夢繞漢唐都
歌罷欬歔

沁園春

夢方字若

何處相逢登寶釵
樓訪銅雀臺
喚廚人斫就東溟鯨
鱠
圉人呈罷西極龍媒
天下英雄使君與操
餘子誰堪共

酒杯車千乘載燕南代北劔客奇材 飲酣鼻息如雷
誰信被晨雞催喚回歎年光過盡功名未立書生老去
機會方來使李將軍遇高皇帝萬戶侯何足道哉推衣
起但悽涼感舊慷慨生哀

又送包尉

我羨君歸一路秋風芙蓉木犀想慈顏望久靈烏乍噪
新眉畫就郎馬頻嘶忙脫征衫快呼斗酒細與家人說
建谿情知道這中年懷抱生怕分攜 丈夫南北東西
應笑殺離筵粉淚啼悵佳人來未碧雲冉冉王孫去後
芳草萋萋明日相思山長水複古道入稀蒨店雞元龍
老有高樓百尺誰共登梯

後木

又寄鍾賢良

我夢見君帶飛霞冠著宮錦袍與牧之高會齊山風月
謫仙同載采石雲濤萬卷星羅千篇電掃不學窮兒賦
楚騷掀髯處有魚龍起舞狐兔悲嗥 英雄埋沒蓬蒿
暗摸索當年劉與曹歎事機易失功名難偶誅茅西崦
種秫東臯柵有雞豚庭無羔雁不是先生索價高人間
窄待相期海上共摘蟠桃

又贈孫季蕃

歲暮天寒一見飄然幅巾布裘儘侵雲鳥道躋攀絕頂
拍天鯨浸笑傲中流矚昔期君紫髯鐵面生子當如孫
仲謀誰知道到中年猶未建節封侯 南來萬里何求

因感慨喬公成遠遊
名姬駿馬都如昨
隻雞斗酒難到新邱
天地無情功名有數
千古英雄只麼休
平生獨羊曇一箇淚
灑西州

又寄九華
葉賢良

一卷陰符二石硬
弓百斤寶刀更
玉花驄噴鳴鞭
電抹烏絲闌
展醉墨龍跳牛角
書生虬鬚豪客談
笑皆從折簡招
依稀記曾請纓
係粵草檄征遼
當年目視雲霄
誰信道淒涼今
折腰悵燕然未
勒南歸草草長
安不見北望迢迢
老去胸中有些磊
塊歌罷猶須著
酒灑休休也
但帽邊鬢減鏡
裏顏凋

摸魚兒

賞海棠

後寸

甚春來冷煙淒雨朝朝遲了芳信驀然作暖晴三日又
覺萬株嬌困天怎忍潘令老不成也沒看花分才情減
盡悵玉局飛仙石湖絕筆孤負這風韻 傾城色懊惱
佳人薄命牆頭岑寂誰問東風日暮無聊賴吹得胭脂
成粉君細認花共酒古來二事天猶吝年光去迅漫綠
葉成陰蒼苔滿地做取異時恨

又感
歎

怪新來倚樓看鏡清狂渾不如舊暮雲千里傷心色那
更亂蟬疏柳凝望久愴故國百年漢闕誰回首功名大
謬歎采藥名山讀書精舍此計何時就 封侯事久矣
輸人妙手扁舟聊作漁叟高冠長劔都閒物世上切身

惟酒千載後君試看拔山扛鼎俱烏有英雄骨朽問顧
曲周郎而今還解來聽小詞否

賀新郎

鬱孤臺

絕頂規危榭跨高寒烏飛不過雲生其下斤斲無聲人
按堵翕忽青紅變化覽城郭山川如畫閣老鳳樓修造
手笑談閒突出凌雲厦臺上景買無價 唾壺塵尾登
臨暇似當年文章太守歐陽公也傾倒贛江供硯滴判
斷雪天月夜更喚取鄒枚司馬銅雀凌歊歌舞罷訪殘
磚斷壁無存者餘翰墨被風雅

又

春景

動地東風起畫橋西繞溪桑柘漫山桃李寂寂牆陰蒼

苔路猶印前回屐齒驚歲月飈馳雲駛太息攀翻長亭
樹是先生手種今如此君不樂欲何俟 傍人錯會淵
明意笑斯翁皇皇汲汲登山臨水佳處徑呼籃輿去彷彿
柴桑栗里從我者門生兒子嘗試平章先賢傳屈原
醒不似劉伶醉判茗芋臥花底

又芍藥

一夢揚州事畫堂深金瓶萬朵元戎高會座上祥雲層
層起不減洛中姚魏歎別後關山迢遞國色天香何處
在想東風猶憶狂書記驚歲月一彈指 數枝清曉煩
馳騎向小窗依稀重見蕪城佳麗料得花憐儂消瘦儂
亦憐花憔悴漫悵望竹西歌吹老矣應無騎鶴日但春

衫點點當時淚那更有舊清味

又送陳子華赴眞州

北望神州路試平章這場公案向誰分付記得太行兵
百萬曾入宗爺駕御今把作握蛇騎虎君去東京豪傑
喜看投戈下拜眞吾父談笑裏定齊魯兩淮蕭索惟
狐兔問當年祖生去後有人來否多少新亭揮淚客不
夢中原塊土這事業須由人做堪笑書生心膽怯向車
中閉置如新嬾空目送塞鴻去

又端午

深院榴花吐畫簾開綵衣紈扇午風清暑兒女紛紛新
結束時樣釵符艾虎早已有游人觀渡老大逢場慵作

戲任陌頭年少爭旗鼓溪雨急浪花舞 靈均標致高
如許憶生平旣紉蘭佩又懷椒糈誰信騷魂千載後波
底垂涎角黍又說是蛟饞龍怒把似而今醒到了料當
年醉死差無苦聊一笑弔千古

又九
日

湛湛長空黑更那堪斜風細雨亂山如織老眼平生空
四海賴有高樓百尺看浩蕩千崖秋色白髮書生神州
淚儘淒涼不向牛山滴追往事去無迹 少時自負凌
雲筆到如今春華落盡滿懷蕭瑟常恨世人新意少愛
說南朝狂客把破帽年年拈出若對黃花孤負酒怕黃
花也笑人岑寂鴻北去日西匿

又遊水東周
家花園

溪上收殘雨倚危闌薄綿乍脫日陰亭午鬧市不知春色處散在荒園廢墅漸小白長紅無數客子雖非河陽令也隨緣暫作鶯花主那可負甕中醕碧雲四合千巖暮恨匆匆余方有事子姑歸去趁取羣芳未搖落暇日提魚就煮歎激電光陰如許回首明年何處在問桃花尙記劉郎否公莫笑醉中語

又郡會聞妓
歌有感

妾出於微賤少年時朱絃彈絕玉笙吹徧粗識詩家關雎亂羞學流鶯百轉總不涉閨情眷怨誰向西隣公子說要珠鞍迎入梨花院身未動意先懶主家十二樓

連苑那人人靚妝按曲繡簾初捲道是畫堂簫管唱笑
殺街坊拍袞回首望侯門天遠我有平生離鸞操頗哀
而不愠微而婉聊一奏更三歎

又端
午

思遠樓前路望平隄十里湖光畫船無數綠蓋盈盈紅
粉面葉底荷花解語鬪巧結同心雙縷尙有經年離別
恨一絲絲總是相思處相見也又重午清江舊事傳
荆楚歎人情千載如新尙沈菰黍且盡尊前今日醉誰
肯獨醒弔古泛幾盞苜蒲綠醕兩兩龍舟爭競渡奈珠
簾暮捲西山雨看未足怎歸去

卜算子

手植海棠盛開風雨
作小詞二首

盡是手成持合得天饒借風雨子花有甚讎作意相陵
藉、做暖逼教開做冷催教謝不負明年花下人只負
栽花者

又

片片蝶衣輕點點猩紅小人道東君不惜花百種千般
巧朝見樹頭繁暮見樹頭少人道東君果惜花雨打
風吹了

一翦梅

中秋解宜
春郡印

陌上行人怪府公還是文窮還是詩窮下車上馬太匆
匆來是春風去是秋風階銜免得管兵農嬉到昏鐘
睡到齋鐘不須提岳與知宮喚作溪翁喚作山翁

木蘭花慢

癸卯生日

病翁將耳順牙齒落鬢毛疏也慙愧君恩放還田舍免
詣公車見時某邱某水到而今老矣可樵漁寶馬華軒
無分蹇驢破帽如初 浮名箕斗竟成虛磨折總因渠
帝錫余別號江湖聲叟山澤仙矐尊前未宜感慨事猶
須看歲晏何如衛武耄年作戒伏生九十傳書

又送鄭
伯昌

古人吾不見君莫是鄭當時更築就山房躬耕谷口名
動京師諸公任他衮衮與杜陵野老共襟期有客至門
先喜得錢沽酒陶疑 昔年聯轡切邊歸陳迹恍難追
說種桃道住看花君子洞蕭蕭非相逢故人問訊道劉

郎老去久無詩把做一場春夢覺來莫要尋思

又

丁未
中秋

水亭凝望久期不至擬還差隔翠幌銀屏新眉初畫半
面猶遮須臾淡煙薄靄被西風掃盡不留些失了白衣
蒼狗奪回雪兔金蟾 乘雲徑到玉皇家人世鼓三搥
試自判此生更看幾度小住爲佳何須如鉤似玦更相
將只有半菱花莫遣素娥知道和它髮也蒼華

最高樓

戊戌
自壽

南嶽後累任作祠官試說與君看仙都玉局纔交卸新
銜又管華州山怪先生吟膽壯飲腸寬 去歲擁旌旗
稱太守今歲帶笈簪稱漫叟慵入鬧慣投閒有時拂袖

尋种放有時攜枕就陳搏任旁人嘲潦倒笑癡頑

又再題周登樂府

周郎後直數到清真君莫是前身八音相應諸韶樂一聲未了落梁塵笑而今輕郢客重巴人只少箇綠珠橫玉笛更少箇雪兒彈錦瑟欺賀晏壓黃秦可憐樵唱并菱曲不逢御手與龍巾且醉眠篷底月甕閒春

臨江仙

縣圃種花○或刻植海棠作

落魄長官江海客少豪萬里尋春而今憔悴向溪濱斷無觴詠興惟有簿書塵手插海棠三百本等閒妝點芳辰他年絳雪映紅雲丁甯風與雪記取種花人

又

庚子重陽余以漕攝帥會前帥唐伯玉前漕黃成父于越王臺明年是日寓海豐縣驛作

去歲越王臺上飲席間二客如龍憑高弔古壯懷同馬
嘶千嶂暮樂奏半天中 今歲三家村市裏故人各自
西東菊花時節酒尊空可憐雙雪鬢禁得幾秋風

又潮惠道中

不見仙湖能幾日塵沙變盡形容夜來月冷露華濃都
忘茆屋下但記畫船中 兩岸綠陰猶未合更須補竹
添松最憐幾樹木芙蓉手栽纔數尺別後爲誰紅

又巳酉和實之燈夕

玉筵鈿車當日事東塗西抹都曾等閒曲子壓和凝曲
相縱遊非草草已醉強惺惺 今向三家村送老身如
罷講吳僧高樓百尺不須登半爐燒葉火一棊勘書燈

昭君怨

牡丹

會看洛陽舊譜只許姚黃獨步若比廣陵花太虧他
舊日王侯園圃今日荆榛狐兔君莫說中州怕花愁

又瓊

華

后土宮中標韻天上人間一本道號玉眞妃字瓊姬
我與花會半面流落天涯重見莫把玉簫吹怕驚飛

清平樂

五月十五
夜翫月

纖雲掃迹萬頃玻璃色醉跨玉龍游入極歷歷天青海
碧水晶宮殿飄香羣仙方按霓裳消得幾多風露變
教人世清涼

又同

前

高風浪快萬里騎蟾背曾識姮娥眞體態素面元無粉
黛 身游銀闕珠宮俯看積氣濛濛醉裏偶搖桂樹人
間喚作涼風

又 頃在維揚陳師文參
議家舞姬絕妙賦此

宮腰束素只怕能輕舉好築避風臺護取莫遣驚鴻飛
去 一團香玉溫柔笑顰俱有風流貪與蕭郎眉語不
知舞錯伊州

又 別意○丹
陽舟中作

休彈別鶴淚與絃俱落歡事中年如水薄懷抱那堪作
惡 昨宵月露高樓今朝煙雨孤舟除是無身方了有
身長有閒愁

長相思

梅惜

寒相催暖相催催了開時催謝時
丁甯花放遲
角聲
吹笛聲吹吹了南枝吹北枝
明朝成雪飛

又寄

遠

朝有時暮有時潮水猶知日兩迴
人生長別離
來有時
去有時
燕子猶知社後歸
君行無定期

又饒別

風瀟瀟雨瀟瀟相送津亭折柳條
春愁不自聊
煙迢迢
水迢迢
準擬江邊駐畫橈
舟人頻報潮

又

煙淒淒草淒淒野火原頭燒斷碑
不知名姓誰
印纍

纍家纍纍千萬人中幾箇歸榮華朝露晞

又

勸一杯復一杯短鋪相隨死便埋英雄安在哉
眉不開懷不開幸有江邊舊釣臺拂衣歸去來

菩薩蠻

戲林推

小鬟解事高燒燭羣花圍繞樗蒲局道是五陵兒風騷
滿肚皮玉鞭鞭玉馬戲走章臺下笑殺灞橋翁騎驢
風雪中

玉樓春

戲呈林節推鄉兄

年年躍馬長安市客舍似家家似寄青錢換酒日無何
紅燭呼盧宵不寐易挑錦婦機中字難得玉人心下

事男兒西北有神州莫滴水西橋畔淚

生查子

元夕戲
陳敬叟

繁燈奪鬢華戲鼓侵明發物色舊時同情味中年別
淺畫鏡中眉深拜樓西月人散市聲收漸入愁時節

憶秦娥

暮春

遊人絕綠陰滿野芳菲歇芳菲歇養蠶天氣采茶時節
枝頭杜宇啼成血陌頭楊柳吹成雪吹成雪淡煙微

雨江南三月

又

已上

脩禊節晉人風味終然別終然別當時賓主至今清絕
等閒寫就蘭亭帖豈知留與人間說人間說永和之

歲暮春之月

又

泥滑滑一聲聲喚征鞍發征鞍發客亭楊柳不禁攀折
荀郎衣上香初歇蕭娘心下書難說書難說霎時吹
散一生愁絕

又感舊

春醒薄夢中毬馬豪如昨豪如昨日月明橫笛曉寒吹角
古來成敗難描摸而今卻悔當時錯當時錯鐵衣猶
在不堪重著

又

梅謝了塞垣解凍鴻歸早鴻歸早憑伊問訊大梁遺老

浙河西面邊聲悄
淮河北去炊煙少
炊煙少宣和宮
殿冷煙衰草

鵲橋仙

戊戌生朝

金風淅淅銀河淡淡
長少羣賢畢會
平生心事麴生知
怪此夕惺惺相對
玄花生眼新霜點鬢
不肯遮藏老態
人間何處有仙方
擘劃得二三百歲

踏莎行

甲午重九牛山作

日月跳丸光陰脫兔
登臨不用深懷
古向來吹帽插花
人盡隨殘照西風去
老矣征衫飄然客路
炊煙三兩人家
住欲攜斗酒答秋光
山深無覓黃花處

水調歌頭

和西北判宗湖樓韻

君看郭西景渾不減孤山飛樓空兀百尺輪奐侈前觀
絕唱新詞寡和墮淚舊碑無恙往事付驚瀾不見遼鶴
返惟對水鷗閒 又何必珠翠盛管絃懽唾壺塵尾瀟
灑領客上高寒丞相功存宗廟祭酒義兼家國世事尙
相關風月寓意耳莫作晉人看

又遊蒲澗追和崔菊坡韻○余頃爲儀真郡督郵
白事維揚崔公銳欲羅致屬先受制置使李公
之辟崔公始聘洪公舜俞入幕後二十五年奉
使嶺外拜公祠像俯仰今昔輒和公所作水調
以寓
悲慨

敕使竟空返公不出梅關當年玉座記憶仄席問平安
羽扇尉佗城上野服仙游閣下遼鶴幾時還賴有蜀耆
舊健筆與書丹 青油土珠履客各凋殘四方蹙蹙靡

騁獨此尙寬閒丞相祠堂何處太傅石碑墮淚木老瀑
泉寒往者不可作置酒且登山

又再和
喜歸

遣作嶺頭使似戍玉門關來時送者舉酒珍重視身安
街畔小兒拍笑馬上是翁鬢鑠頭與壁俱還何處得仙
訣髮白頰猶丹 屋茆破籬菊瘦架籤殘老夫自計甚
審忙定不如閒客難楊雄拓落友笑王良來往面汗背
芒寒再拜謝不敏早晚乞還山

又三和○解印
有期戲作

老子頗更事打透利名關百年擾擾于役何異入槐安
夢裏偶然得意醒後纔堪發笑蟻穴駕車還恰佩南柯

印髣髴數曾丹 客未散日初暎酒猶殘向來幻境安
在回首總成閒莫問浮雲起滅且踟剛風遊戲露冷玉
簫寒寄語抱朴子候我石樓山

又四和○八月上澣解
印別同官席上賦

半世慣歧路不怕唱陽關朝來印綬解去今夕枕初安
莫是散場優孟又似下棚傀儡脫了戲衫還老去事多
忘公莫笑師丹 筆端花胸中錦兩消殘江湖水草空
曠何必養天閒久苦諸君共事更盡一杯別酒風露夜
深寒回首行樂地明日隔雲山

又五和○客散循
隄步月而作

落日幾呼渡佳夕每留關有時來照清淺鬢雪似潘安

一曲親蒙君賜兩岸更無人迹惟見鷺飛還隙地欠栽
接蕉荔雜黃丹 柳全疎松尚幼怕摧殘旁人笑我癡
計管鑰費防閑翁意在乎林壑客亦知夫水月滿腹貯
清寒賦詠差有愧赤壁與滁山

又六和○次夕觴客
湖上賦葛仙事

羯虜問周鼎柱史出秦關苦求勾漏何意身世遠差妄
不見跼鳶墮水時有飛鴻遵渚樂此久忘還采藥寓言
耳胸次有靈丹 釣游處榕葉暗荻花殘自翁仙後干
載輸與水鷗閒我讀內篇未竟忽被急符驅去洞閉白
雲寒回首愧幽子隱約海中山

又七和○十三夜同官
載酒相別不見月作

怪事廣寒殿此夕不開關林間烏鵲相賀暫得一枝安
只在浮雲深處誰駕長風挾取明鏡忽飛還玉兔呼不
應難覓日中丹 酒行深歌聽徹笛吹殘嫦娥老去孤
另離別匹如閒待得銀盤擎出只怕玉峯醉倒衰病不
禁寒卿去我欲睡辜負此湖山

又癸卯中秋作

老去有奇事天放兩中秋使君飛榭千尺縹緲見麟洲
景物東徐城上歲月北征詩裏圓缺幾時休俯仰慨今
昔惟酒可澆愁 風露高河漢澹素光流賈胡野老相
慶田海十分收競看姮娥金鏡爭信仙人玉斧費了一
番修衰晚筆無力誰伴賦黃樓

哨徧昔坡公以盤谷序配歸來詞然陶詞既櫟括入律韓序則未也暇日游方氏龍山別墅試

效顰爲之俾主人刻之崖云

勝處可官平處可田泉土尤甘美深復深路絕佳人稀
有人兮盤旋於此送子歸是他隱居求志是要明主媒
當世嗟此意誰論其言甚壯孔顏猶有遺旨大丈夫之
被遇于時入坐廟朝出旗麾列屋名姬夾道武夫滿前
才子 噫有命存焉吾非惡此而逃之富貴人所欲如
之何幸而致向茂樹堪依清泉可濯谷中別有閑天地
繪細於絲蕨甜似蜜采於山釣於水大丈夫不遇時之
所爲唐處士依稀是吾師覺山林尊如朝市五侯門下
賓客擾擾趨形勢嗟盤之樂誰爭子所占斷千秋萬歲

呼僮秣馬更膏車便與君從此遊矣

賀新郎

吾少多奇節頗擲揄玉關定遠壺頭新息一劔防身行
萬里選甚南溟北極看塞雁銜來秋色不但槩碁夸妙
手管城君亦自無勍敵終賈輩恐難匹 酒腸詩膽新
來窄向西風登高望遠亂山斜日安得良弓并快馬聊
與諸公角力漫醉把闌干頻拍莫恨寒蟬離海晚待與
君秉燭游今夕歡易買健難得

又

杜子昕
觀歌

盡說番和漢這琵琶依稀似曲驀然絃斷作麼一年來
一度欺得南人技短歎幾處城危如卯元凱後身居玉

帳報天驕休作尋常看佈嚴令運奇算 開門決鬪雌
雄判笑中宵奚車羶屋獸驚禽散箇箇巍冠橫塵柄誰
了君王此段也莫靠長江能限不論周郎并幼度便仲
尼復起嗟微管馳露布築京觀

又跋唐伯玉奏藁

宣引東華去似當年文皇親擢馬周徒步殿上風霜生
白簡下殿扁舟已具怎不與官家留住古有一言腰相
印誰教他滿篋嬰鱗疏還笏退不迴顧 新來邊報猶
飛羽問諸公可無長策少寬明主攀檻朱雲頭雪白流
落如今底處但一片丹心如故賴有越臺堪眺望那中
原莫已平安否風色惡海天暮

又送唐伯玉還朝

驛騎聯翩至道臺家籌邊方急酒行姑止作麼攜將琴
鶴去不管州人墮淚富與貴平生無味可但紅塵難著
腳便山林未有安身地搔白髮兀相對 前身小范疑
公是憶當年天章閣上建明尤偉慶厓諸賢方得路便
不容他老子須著放延州城裏一句殷勤牢記取在朝
廷最好圖西事何必向玉關外

又送黃成父還朝

飛詔從天下道中朝名流欲盡君王思賈時事祗今堪
痛哭未可徐徐俟駕好著手扶將宗社多少法筵龍象
眾聽靈山祝付些兒話千百世要傳寫 子方行矣乘

驄馬又送它江南太史去游瓊厦老我伴身惟有影倚
徧風軒月榭悵玉手何時重把君向柳邊花底問看貞
元朝士誰存者桃滿觀幾開謝

又

戊戌壽張史君
九月十八日

南國秋容晚曉寒輕芙蓉臺榭拒霜池館試向壺山堂
上望萬頃黃雲刈徧總喫著君侯方寸不要漢庭誇擊
斷要史家編入循良傳春腳到福星現 家家香火人
人願要還他慶元狨座建炎蟬冕穩奉安輿迎兩國誰
謂山遙水遠福壽比河沙難算來歲而今黃花節早驂
鸞入侍瑤池宴風浩蕩海清淺

又宋庵

訪梅

鵲報千林喜還猛省謝家池館暝寒天氣要與瑤姬敘
離索草草杯盤籍地悵減盡何郎才思不願玉堂并金
屋願年年歲歲花間醉餐秀色挹高致西園飛蓋東
山妓問何如半山雪裏孤山煙外管甚夜深風露冷人
與長餅共睡任翠羽枝頭多事老子平生無他過爲梅
花受取風流罪簪白髮莫教墜

又

和人詠
茶蘼

曾與瑤姬約恍相逢翠裳搖曳珠鞞聯絡風露青冥非
人世攬結玉龍驂鶴愛萬朵千條纖弱禱祝花神憐惜
取到開時晴雨須斟酌枝上雪莫銷卻惱人匹似中
狂藥凭危闌燭光交映樂聲遙作身上春衫香熏透看

後木
到參橫月落算茉莉猶低一著坐有緜山王郎子倚玉
簫度曲難爲醉君不飲鑄成錯

又用前韻賦
黃荼蘼

想赴瑤池約向東風名姬駿馬翠鞵金絡太液池邊鵠
羣下又似南樓呼鶴畫不就穠纖嬌弱羅帕封香來天
上瀉銅盤沆漉供清酌春去也被留卻 芳魂再反應
無藥似詩詠綠衣黃裏感傷而作愛惜尙嫌蜂採去何
況流鶯蹴落且放下珠簾遮著除卻江南黃九外有何
人敢與花酬酢君認取莫教錯

又再用
約字

淺把宮黃約細端相普陀煙裏金身珠絡萼綠華輕羅

鞦韆小飛下祥雲仙鶴朵朵賽蜂腰纖弱已被色香療病
思儘鵝兒酒美無多酌看不足怕殘卻 人間難得傷
春藥更枝頭流鶯喚起少年狂作留取姚家花相伴羞
與萬紅同落未肯讓蠟梅先著樂府今無黃絹手問斯
人清唱何人醉休草草認題錯

又郡宴

和韻

草草池亭宴又何須珠鞦絡臂琵琶遮面賓主一時詞
翰手倏忽龍蛇滿案傳寫處塵飛鶯囀但得時平魚稻
熟這腐儒不用青精飯陰霧掃霽華見 使君償了豐
年願便從今也無敲朴也無廚傳試拂籠紗看壁記幾
箇標名渠觀想九牧聞風爭羨此老飽知民疾苦早歸

來載筆熏風殿詩有諷賦無勸

又再和前韻

夢斷鈞天宴怪人間曲吹別調局翻新面不是先生瘖
啞子怕殺烏臺舊案但掩耳蟬嘶禽囀老去把茅依地
土有瓦盆盛酒荷包飯停造請免朝見少狂誤發功
名願苦貪他生前死後美官佳傳白髮歸來還自笑管
轄希夷古觀看一道冰銜堪羨如子將軍嗔未已問匡
山何似金鑾殿休更待杜鵑勸

又題蒲澗寺

風露驅炎毒記仙翁飄然謫墮吹笙騎鶴歷歷漢初秦
季事山下瓜猶未熟過眼見羣雄分鹿想待拂衣游汗

漫試回頭劉項俱蠻觸斫鯨鱠脯鱗肉 越人好事因
成俗擁遨頭如雲士女山南山北問訊先生無恙否齊
魯干戈滿目且游戲扶胥黃木不是世無瓜棗便有
來肯飽癡兒腹聊舉酒笑相屬

又

王實之喜予出嶺命愛姬
歌新詞以相勞輒次其韻

此腹元空洞少年時諸公過矣上天吹送老大被它禁
害殺身與浮名孰重這般笛休休拈弄綵筆擲還殘錦
去用江淹鮑昭事願今生來世無妖夢且飯犢莫吞鳳 新來
喑啞如翁仲羨王郎驂鸞縹緲玉簫吹動應笑夔州村
裏女灸面生愁進奉要絕代傾城安用今古何人知此
理有吾家酒德先生頌三萬卷漫充棟

後村

又蒙恩主崇禱
再用前韻

主判茅君洞有簷閒查查喜鵲曉來傳送幾度黃符披

戴了此度君恩越重僕五任祠廟一南岳二仙都三玉局四雲臺五崇禱被賀監

天隨調弄做取散人千百歲笑渠儂一霎邯鄲夢歌而

過鳳兮鳳 灌園織履希陳仲問先生加齊卿相可無

心動除卻醴泉中太乙揀箇名山自奉那捷徑輸它藏

用有耳不會聞黜陟免教人貶駁徂徠頌服蘭佩結茅

棟

又二
和

謫下神清洞更遭它挪揄黠鬼路旁遮送薄命書生雞

肋爾卻笑尊拳忒重破故紙誰教繙弄一枕茅簷春睡

美便周公大聖何須夢門前客任題鳳
卜鄰羊仲并
求仲願春來西疇雨足土膏犁動白髮巡官占歲稔不
問京房翼奉棹與甕從今無用醉與老農同擊壤莫隨
人頭獻嘉禾頌在陋巷勝華棟

又

生日用實
之來韻

鬢雪今千縷更休休癡心默望故人明主晚學瞿聃無
所得不解飛昇滅度似曉鼓夔夔搗五散盡朝來湯餅
客且烹雞要飯茅容母怕迴首太行路 麟臺學士微
雲句便尊前周郎復出審音無誤安得春鶯雪兒輩輕
拍紅牙按舞也莫笑儂家蠻語老去山歌尤協律又何
須手筆如燕許援琴操促箏柱

又再用
前韻

放逐身縑縷被門前羣鷗戲狎見推盟主若把士師三
黜比老子多他兩度袖手看名場呼五不會車邊望塵
拜免它年青史羞潘母勾曲洞是歸路 平生怕道蕭
蕭句况新來冠欹弁側醉人多誤管甚是非并禮法頓
足低昂起舞任百鳥喧啾春語欲托朱絃寫悲壯這琴
心脈脈誰堪許君按拍我調柱

又實之三和有憂邊
之語走筆答之

國脈微如縷問長纓何時入手縛將戎主未必人間無
好漢誰與寬些尺度試看取當年韓五豈有穀城公付
授也不干曾遇驪山母談笑起兩河路 少時棋枰會

聯句歎而今登樓攬鏡事機頻誤聞說北風吹面急邊
上衝梯屢舞君莫道投鞭虛語自古一賢能制難有金
湯便可無張許快投筆莫題柱

又

四用縷字韻
爲王實之壽

萬字如鐵縷憶王郎丹墀大對氣爲文主貴近旁觀俱
失色仰止如天聖度笑杜牧成名居五晚面清光猶苦
諫似封人懇切言君母謫塵世錯行路 當時宜和薰
風句又那知青雲一跌被才名誤輸與靈和殿前柳柔
較隨風學舞怪兩鳥新來停語不是先生高索價問何
時宰相先生許舉杯祝莫傾柱

又

實之用前韻爲
老者壽戲答

身畔無絲縷但從前練裳練帨做他家主甲子一周加

二紀兔走鳥飛幾度賽孔子如來三五

徐陵云小如來五歲多孔子三

年鶴髮蕭蕭無可截要一杯留客慙陶母門外草如迷

路 朗吟白雪陽春句狩夫君驪駒不至鵲聲還誤老

去聊攀萊子例倒著斑衣戲舞記田舍火爐頭語肘後

黃金腰下印有高堂未敢將身許且扇枕莫倚柱

沁園春

癸卯佛生翌日將曉夢中作既醒但易數字

有箇頭陀形等枯株心猶死灰幸春山筍賤無人爭喫
夜爐芋美與客同煨何處旛花忽相導引莫是天宮迎
赴齋又疑道向毗耶城裏講席初開 這邊尙自徘徊
笑那裏紛紛早見猜有尊神奮杵拳麤似鉢名緇豎拂

喝猛如雷老子無能山僧不會誰誤檀那舉請哉山中
去便百千億劫休下山來

又和吳尙書叔永

我所思兮延陵季子別來九春笑是非浮論白衣蒼狗
文章定價秋月華星獨步岷峨後身坡穎何必荀口有
二仁中朝裏看叔兮袞斧伯也絲綸洛中曾識機雲
記玉立堂堂九尺身歎苕溪漁艇幽人孤往雁山馬鬣
弔客誰經宣室釐殘立都花謝回首舊游存幾人新腔
美堪洗空恩怨喚起交情

又吳叔永尙書和予舊作再答

莫羨渠儂白玉成樓黃金築臺也不消顛怪騎鱗被髮

誰能委曲令鳩爲媒鬢有一毛袖閑雙手只子持螯與
把杯公過矣賞陳登豪氣杜牧麤才 便煩問訊張雷
甚斗宿無光劔不迴想閣中鳴佩時攜客去壁間懸榻
近有誰來撤我虎皮讓君牛耳誰道兩賢相戾哉中年
後向歌闌易感樂極生哀

又維揚

作

遼鶴重來不見繁華只見凋殘甚都無人誦何郎詩句
也無人報書記平安閭里俱非江山略是縱有高樓莫
倚闌沈吟處但螢飛草際雁起蘆閒 不辭露宿風餐
怕萬里歸來雙鬢斑算這邊贏得黑貂裘弊那邊輸了
翡翠衾寒檄草流傳吟牋倚閣開到瓊花亦嬾看君記

取向中州差樂塞地無歡

摸魚兒

用實之韻

便披蓑荷鋤歸去何須身著宮錦與誰共話桑麻事朱
老阮生尤稔篩樣餅甕樣壘長鬚赤腳供樵飪清流濁
品盡掃去胸中置諸膜外對酒莫辭飲 華胥夢怕殺
人驚曉枕疏牕惟月來闖一生常被弓旌誤且告朝家
追寢愁箇甚君管取有薇堪采松堪蔭茆山再任幸不
是謀臣又非世將免犯道家禁

一剪梅

余赴廣東實之夜餞于風亭

束縵宵行十里強挑得詩囊拋了衣囊天寒路滑馬蹄
僵元是王郎來送劉郎 酒酣耳熱說文章驚倒鄰牆

推倒胡牀旁觀拍手笑疏狂又何妨狂又何妨

滿庭芳

記夢

涼月如冰素瀉翻雪人世依約三更扁舟乘興莫計水
雲程忽到一洲奇絕花無數多不知名渾疑是芙蓉城
裏又似牡丹墀蓬萊應不遠天風海浪滿目淒清更
一聲鐵笛石裂龍驚回顧塵寰局促揮袂去散髮騎鯨
蘧蘧覺元來是夢鐘動野雞鳴

鷓鴣天

腹疾且睡和
朱希真詞

前度看花白髮郎平生痼疾是清狂幸然無事汗青史
省得教人奏赤章游俠窟少年場輸他羣謝與諸王
居人不識庚桑楚弟子誰從魏伯陽

又戲題周
登樂府

詩變齊梁體已澆香奩新製出唐朝紛紛競奏桑間曲
寂寂誰知爨下焦 揮綵筆展紅綃十分峭措稱妖饒
可憐才子如公瑾未有佳人敵小喬

卜算子

亂似盎中絲密似風中絮行徧茫茫禹迹來底是無愁
處 好客挽難留俗事推難去惟有翻身入醉鄉愁欲
來無路

木蘭花慢

壽王
實之

瀛洲眞學士爲底事在紅塵爲語觸宮闈沈香亭裏噴
謫仙人爲親近君側者見萬言策子甚劉蕡爲是尙方

請劔漢廷多憚朱雲 君言往事勿重陳且鬪酒邊身
也不會區區算它甲子記甚庚寅爾曹譬如朝菌又安
知老柏與靈椿世上榮華難保古來名節如新

念奴嬌

壽方德潤

卯君來處與眉州仙子依稀同日一自前朝龔蔡後頗
覺壺山岑寂誰料端平繼居遺補復有斯人出幘巾林
下姓名玉座長憶 須信諂語尤甘忠言最苦橄欖何
如蜜諸老蕭疏星欲曉留取南都鐵壁洛社自佳鏡湖
雖好莫問君王乞年年歲歲大家同做眞率

又

丙午鄭少師生日

禁中張讌苦留公未許歸尋初服千載君臣魚有水不

比巖光文叔大德中天客星一夕草草聊同宿重來凝
碧依然賡載相屬 過眼夸奪紛紛浮雲野馬幾度棋
翻局客話鳳池三入事洗耳湖光一曲伯始泉荒穉圭
圃冷占斷西風菊年年歲歲金英常泛芳醪

考淳祐辛丑八月御批云劉克莊文名久著史
學尤精可特賜同進士出身由是負一代盛名
偶有題跋後人輒以爲定衡所撰別調一卷大
率與辛稼軒相類揚升庵謂其壯語足以立懦
余竊謂其雄力足以排冝云湖南毛晉識

後村別調終

復林

後村別調補

宋 劉克莊

沁園春 二鹿

馴於蹇驢清於賜駒我行爾從幸柴車堪駕何慙韓衆
藥苗可採長伴龐公野澗泉甘陽坡草暖有柏葉松枝
充短供休夢想去游周靈囿入望夷宮 與誇奪子爭
雄生與死未知誰手中況嗾螭者衆放麕人少大將觸
網小亦傷弓風日和柔山林深密折角何如且養茸二
虫喜各銜花拜跪來壽樽翁

又 夢中作梅詞

天造梅花有許孤高有許芬芳似湘娥凝望歛君山黛

明妃遠嫁作漢宮妝冷艷誰知素標難藝又似夷齊餓
首陽幽雅意縱寫之縑素未得毫芒 曾經諸老平章
只一箇孤山說影香念詔書存問漫招處士節旄落盡
草屋二字疑誤中郎日暮天寒山空月墮茆舍清於白玉堂
寧淡斂不敢憑羌笛告訴淒涼

又 和林卿均

慚愧清朝罷貢包茅但發牙璋便羊裘歸去難留嚴子
牛衣病卧肯泣王章疇昔憂天如今懷土田舍雞肥社
酒香甘雨足且免扶鋤苦免踏車忙 先生少擬荀揚
晚自覺才衰可斗量甚都無白鳳飛來元草亦無紫氣
下燭干將待得新亭倒持手版何似抽還政事堂榮與

辱算到頭由我不與蒼蒼

漢宮春

祕書弟家賞紅梅

青女初晴向醜梢枯幹幻出妍姿休煩苑吏剪綵別有神司東皇太一敕瑤姬淡傅燕支還似得華清湯暖薄綃半卸冰肌應笑楚宮癡絕略施朱則箇便妬蛾眉唐人更無虱在浪比紅兒祥雲難駐且丁寧鉄笛輕吹拚沈醉花間一霎莫教絳雪離披

又

呈張別駕

京輦相逢憶茂陵臨御俱詣天官絳紗玉斧咫尺先引頭班桃花滿觀與貞元朝士同看歸騎晚春城笳散冶游侵曉方還回首龍髯何在漫共談前事淚洒橋山

誰憐白頭柱史獨出函關君如春柳到如今也帶蒼顏
憑寄語江州司馬琵琶且止休彈

念奴嬌

七月望夕望月昔方孚若每以是夕泛湖觴客云修坡仙故事

天風浩蕩掃殘暑推上一輪圓魄愛舉眉山公舊話與
客泛舟赤壁一自奎星去朝帝所嘆洞簫聲息空餘二
賦至今淒動金石長記詩境平生詩豪酒聖亦自仙
中謫疇昔停橈追歡處忍聽鄰人吹笛董相祠荒賀公
湖在俯仰成陳跡兩翁已矣年年孤負今夕

又

少時獨步詞場引弦百發無虛矢歲晚却蒙崑體力世
業工修鞋底曾裂白麻曾塗墨敕謫墮俄徵起鼎湖龍

去老臣何以堪此 回首當日遭逢譬如春夢誤入華
胥裏推枕黃梁猶未熟封拜幾王侯矣似盞中蛇似蕉
中鹿又似槐中蠹先人書在尙堪追補遺史

又

和誠齋休致韻

此翁雙手頓閒處且把香篝籠袖西掖北門辭不要肯
要南柯太守小小亭臺些些竹木何必靈和柳地行仙
裏合推儂做班首 取次著絕交書續歸田錄誰掣先
生肘莫遣朝衣梅醜了留祝南山之壽蒼妓上廳老僧
封院得似樗庵叟虛名身後生前且一杯酒

又

並遊英俊從頭數富貴消磨誰紀道眼看來歎人生如

後
寄家如旅邸教婢羹藜課奴種韭聊誑殘牙齒草堂綿
蘿百年栖託於此 歲晚筆禿無花探懷中殘錦剪裁
餘幾腳上頑麻賜他靈壽杖也難扶起謝絕交遊變更
名姓日暮空山裏老僭復出不知誰氏之子

轉調二郎神

和
林農卿均

抽還手板受用處十分輕省便衣剪家機飯炊躬稼且
免支移係省帝憫龍鍾蠲朝謁予長假毋煩申省笑木
石虛齋暮年欣做端明提省 閒冷橐金散盡書筒來
省有小小樓兒看山待月絕勝崔公望省兩鶴隨軒一
奴負插此外諸餘從省把一生本末綠章奏過奉元都
省

滿江紅

和吳叔永尚書均時吳喪少子

著破青鞋渾不意，蹋他龍尾更冷笑。癡人擘畫二三百
歲殤子，彭篋誰壽。天靈均漁父，爭醒醉向江天極目羨
禽魚悠然矣。杯中物姑停止，牀頭易聊拋廢慨。事常
八九不如人意，白雪調高尤協律。落霞語好終傷綺，待
煩公巨手一摩挲。文公記

又端午

梅雨初收渾不辨，東陂南蕩清。旦裏鼓鐃動地，車輪空
巷。畫舫稍慙京輦俗，紅旗會踏吳兒浪。共葬魚娘子，斬
蛟翁窮歡賞。麻與麥俱成長，蕉與荔應來享有纍臣
澤畔感時惆悵，縱使萑蒲生九節，爭如白髮長千丈。但

浩然一笑獨醒人空悲壯

又中秋

說與行雲且擱就姮娥今夕俄變現金蟻能紫玉蟾能
白九萬里風清黑眚三千世界純銀色想天寒桂老已
吹香堪攀摘 湘妃遠誰鳴瑟桓伊去誰橫笛歎素光
如舊朱顏非昔老去歡悰無奈減愁來酒量常嫌窄倩
何人天外挽冰輪長留得

又次徐使君燈夕均

笳鼓春城處處有豐年語笑渾忘卻金蓮前導青藜下
照白雪唱來應寡和朱顏老去難重少羨黑頭四十已
專城真英妙 奎文寵崇儒教田老喜寬租詔有春陵

之什無潮州表怪雨盲風希發作華星秋月爭光耀看
來年此夜侍端門開佳兆

又海棠

壓倒羣芳天付與十分穠艷嬌嫩處有情皆惜無香何
嫌恰則才如鍼粟大忽然誰把燕支染放開遲不肯墜
梅花羞寒儉 時易遇春難占歡事薄才情欠覺芳心
欲許冶容微斂四畔人來攀折去一番雨過離披漸更
那堪幾陣夜來風吹干點

風流子

白蓮

松桂各參天石橋下新種一池蓮似仙子御風來從姑
射地靈獻寶瘞向藍田笑曾入先生虛白室不喜傳朱

鉛記茂叔谿頭深衣聽講遠公社裏素衲安禪 山間
多紅鶴端相久鷲地飛去翩躚但蝶戲鷺翹有時偷近
旁邊對月中乍可伴娥孤冷牆頭誰肯窺玉三年俗客
濃妝安知國艷天然

賀新郎

老去光陰駛向西風疎林變纈殘霞成綺尙喜暮年腰
脚健不礙登山臨水算自古英游能幾客與桓公俱臭
腐獨流傳吹帽狂生耳後來者亦猶此 籃輿伊軋柴
桑里問黃花沒些消息空籬而已賴有一般芙蓉月偏
照先生懷裏且覓箇闌干同倚檢點尊前誰覓在憶平
生共插茱萸底歡未足飲姑止

又 己未九日飲倉部弟兌庵

憶昔俱年少向斯晨登高懷古賦詩舒嘯追數尊前插
花客人物並皆佳妙縈幾度西風殘照元子寄奴曾富
貴到而今一一消磨了君不樂後人笑 山南山北添
華表歎歸來謝池草合黃臺瓜少老去受持齊物論誰
管彭殤壽夭待細說教天知道不羨兩蘇并二宋願弟
兌歲歲同吹帽杯到手莫辭醕

又 再和

何必游嵩少屋邊山松風浩蕩虎龍吟嘯舊慕楚人悲
秋作晚愛陶詩高妙髮如此臨流羞照屈指向來夸毗
子被西風一筆都勾了曾不滿達人笑 當年玉振於

江表恨而今老身空在歡欣漸少假使真如彭祖壽蒙
叟猶嗤渠天偶落筆不經人道歲晚連牀談至曉勝岡
頭出沒看烏帽君舉白我頻醕

又三和

人老難重少強追陪李侯痛飲劉郎清嘯報答秋光無
一字虛說君房語妙且匣起青銅休照賴有多情籬下
菊待西風不肯先開了留晚節發孤笑 孔璋客紹衡
依表有誰憐戴花翁病插萸人少生不逢場閒則劇年
似龔生猶天喫緊處無人曾道到得扶他迂叟出算貂
蟬未抵深衣帽街酒賤更沽醕

又

石末大日贈翁將蘇食

拂袖歸來也懶追陪竹林嵇阮蘭亭王謝誰與此翁相
暖熟賴有平生伯雅且放意高吟閑話山鳥山花皆上
客又何須勝似公榮者胸磊塊總澆下 盤龍癡絕求
鵝炙這先生黃齏甕熟味珍無價酒頌一篇差要妙莊
列諸書土苴任禮法中人嘲罵君特未知其趣耳若還
知火急來投社共秉燭惜今夜

八聲甘州

雁

物微生處遠往還來非但稻梁求似愛長安日怕陰山
雪善自爲謀箇裏幸無鳴鏑隨意占沙洲歸興何妨待
風景和柔 昔到衡陽回去今隨陽避地徧海南頭與
西川流寓彼此各淹留未得雲中消息登望鄉臺了又

登樓江天闊幾行人字字含愁

燭影搖紅

用林卿均

拙者平生不曾乞得天孫巧那回忝扈屬車來豈是齊
卿小此膝不曾屈了更休文腰難運掉前賢樣子表聖
官休申公告老涼簟安眠絕勝儼直鈴聲悄集中大
半是詩詞幸沒潮州表月夕花朝吟嘯歎人間愁多樂
少蓬萊有路辦箇船兒逆風也到

祝英臺近

雨淒迷風料峭情緒被花惱白白紅紅滿地無人掃可
堪解珮盟寒墜樓命薄更杜宇枝頭閒燭綠陰繞青
帝結束匆匆轉眼朱明了怕與春詞茗芋玉山倒後期

覺做明年年春好却不道明年人老

浪淘沙

素馨

目力已茫茫
縫菊爲囊論
衡何必帳中藏
却愛素馨清
鼻觀採半禪牀
風露送新涼
冰麝開房旋吹銀燭閉
華堂無奈紗幮遮不住
一地聞香

法駕導引

樵歌爛丹竈熟
一跳出紅塵
斗紫一双龍奮蟄
帝青九萬里爲程
赤腳踏層雲
鞭鸞上騎麟
下仿佛覩崑侖
洒馬鬃泉蘇赤地
翻蟾滴水漲滄溟
笑斂懵仙人

卜算子

燕

已怪社愆期
尙喜巢如故
過了清明未肯來
莫被春寒

後補
誤 常傍畫簷飛忽委空梁去忘卻王家與謝家別有
銜泥處

又茉莉

老圃獻花來異域移根至相對炎官火傘中別有清涼
意 淡薄古梳妝閒雅仙標致欲起涪翁再品花壓了
山礬弟

朝天子

宿雨頻飄洒歡喜斂西疇耕者終朝連夜有珠璣鳴瓦
漸白水青秧鷗鷺下老學種花兼學稼心兩挂這幾
樹海棠休也

右後邨詞二十九闕汲古刻後邨別調所無見

于侯官葉申薌閩詞鈔而葉氏又得之于同縣
陳左海先生所錄天一閣大全集本者也毛刻
缺字亦得校補故重刻毛本而以此帙附焉宣
統改元夏五番禺沈宗畸

後村別調補